

FUNDASAUN ALOLA

Vizaun Jerál kona-ba Organizasaun no Aprosimasaun kona-ba Jéneru

Fundasaun Alola ne'e ONG Timoroan ida ho perfíl boot ne'ebé bazeia iha Dili. Primeira-Dama Repúblika Demokrátika Timor-Leste nian (RDTL), Kirsty Sword Gusmão, maka harii organizasaun ne'e iha tinan 2001.

Inspirasaun ba Fundasaun nia naran no nia misaun mai husi istória Juliana dos Santos nian, ne'ebe ema hatene hanesan 'Alola'. Iha 1999, melísia sira lori-halai Alola, ne'ebé ho tinan 14, husi nia sidade moris-fatin iha Suai ba Timor Loromunu. Iha ne'ebá sira dadur nia no submete nia ba violasaun seksuál dala-barak. Sira sei kaer metin nia iha Timor Loromunu. Sra. Gusmão promove no defende Alola nia direitu atu halibur ho nia aman-inan liu husi baliza rai-ketan no liberdade atu hili nia futuru. Bainhira harii tiha, Fundasaun Alola nia prioridade boot liu direktamente bazeia ba ne'e, liuhusi kampaña no konsiensializasaun públika kona-ba violénsia hasoru fetu no labarik-fetu sira iha Timor-Leste.

Fundasaun Alola nia Motto: Feto Forte, Nasaun Forte

Fundasaun Alola nia Vizaun: Haforsa fetu iha Timor-Leste liu husi kultura, ekonomia, dezenvolvimentu umanu no comunidade.

Fundasaun Alola nia misaun agora-ne'e hakat liu ona foku inisiál ba violénsia ho baze iha jéneru. Nia preokupasaun aas liu maka fetu no labarik sira-nia nesesidade, partisipasaun no estatutu iha nasaun Timor-Leste nia dezenvolvimentu, hanesan hakerek iha nia motto 'fetu maka'as, nasaun maka'as'. Organizasaun ne'e hala'o nia servisu liu-liu husi unidade família nian, ho énfaze maka'as ba fetu nia knaar nu'udar inan, no liu husi fetu sira-nia organizasaun komunitária sira, hanesan kooperativa ki'ik oan sira no grupu inan sira nian. Servisu ne'e nia objetivu maka atu fó motivasaun ba lideransa fetu nian no sira-nia abilidade atu fó resposta efetiva ba sira-nia nesesidade ho baze iha realidade oin-loron nian, la'os atu halo mudansa radikál ba knaar jéneru fetu ninian.

Fundasaun Alola utiliza emansipasaun fetu nian, liu husi fetu nia pozisionamentu hanesan ajente ativu ho kbiit atu servisu hamutuk hodi deside kona-ba sira-nia nesesidade no buka atu responde ba nesesidade hirak ne'e. Alola nia área programa sira dezenvolve hanesan resposta ida ba kontatu diretu ho fetu sira. Organizasaun ne'e ninia servisu lubun ida halo ona atu buka hatán ba fetu no labarik sira iha Timor-Leste ninia nesesidade balu ne'ebé báziku no imediatu liu. Hanesan ezemplu, nesesidade hirak ne'e inklui nesesidade saúde nian no reseita ba inan no oan, área ne'ebé baibain prosesu polítiku laiha kbiit ka vontade atu halo asaun.

Maske nia baze sentral iha Dili, Fundasaun Alola halo servisu iha distritu 13 Timor-Leste tomak liu husi nia rede oin-oin, inklui Grupu Apoiu ba Inan, kooperativa soru-tais nian, Ekola Belun no subsídiu eskolár ba estudante sira.

Fundasaun Alola emprega pesoál Timoroan no estranjeiru. Maske maioria husi membru na'in 14 ne'ebé halo parte iha programa ne'e mesak mane no fetu Timoroan, Anne Bunning, CEO ida husi Australia, maka tuur nafatin hanesan xefe organizasaun ne'e nian, no Kirsty Sword Gusmão maka Prezidente Diresaun nian. Diresaun ne'e inklui naran boot sira seluk hanesan Maria Olandina Caeiro Alves, ativista direitu fetu nian ne'ebé oras-ne'e servisu iha Komisaun

Verdade no Amizade Timor-Leste – Indonesia, no Milena Pires, Diretora UNIFEM nian iha Timor-Leste.

Hanesan ONG Timoroan ida, Fundasaun Alola iha pozisaun uniku tanba nia harii no hetan apoiu husi Sra. Sword Gusmão ne'ebé iha asesu maka'as ba comunidade Timor no comunidade internasionál, ho Australia ne'ebé fornese baze atu halibur fundus no apoiu seluk. Alola bele mós hetan apoiu fundus nian husi ema individual sira, liuhusi nia doasaun online no facilidade atu tau iha nia konta iha banku. Organizaun oin-oin maka fornese fundus ba programa spesífiku sira, hahu husi ajénsia sira Nasoens Unidas ninian, hanesan UNFPA no UNICEF, to'organizaun ki'ik oan sira no ONG sira iha Australia no rai seluk.

Programa

Hahú iha tinan 2001 bainhira nia harii tiha, Fundasaun Alola dezenvolve no redefini hikas nia programa iha área lima: saúde inan no oan nian, edukasaun, dezenvolvimentu ekonómiku, advokasia no jestaun. Programa sira-ne'e prepara tuir estratéjia ida atu hatán ba aspetu xave sira misaun Fundasaun ne'e nian. Alola iha mós parseria oin-oin ho grupu komunitáriu feto Timoroan no ONG sira, ne'ebé nia fó fundus no forma seluk apoiu ninian ba sira.

Fundasaun Alola hetan ona fundus foun, tan ne'e tinan 2007 sei hamosu tan programa foun balun no mós haforsa atividade ne'ebé iha ona, hanesan Alola nia programa kona-ba Dezenvolvimentu Ekonómiku, sei dezenvolve tan. Alola sei introdús mós programa ki'ik oan ida kona-ba subsídiu atu fó kbiit ba feto sira atu hala'o projetu saúde nian iha sira-nia comunidade. Subsídiu sira-ne'e uluk nanain sei fó ba Alola nia rede hirak ne'ebé iha ona, ezemplu Grupu Apoiu Inan sira-nian. Nune'e mós, Alola nia eskritóriu foin daudaun ne'e loke luan tan no facilidade haree labarik nian halo ramata ona. *Childcare* ne'e sei oferese ba pesoál Alola ninian atu komplementa nia programa kona-ba lisensa tuur-ahi (*maternity leave*) ba fulan tolu maibe sei simu saláriu, ne'e atu fó motivasaun ba inan nia susu-been ba kosok oan. Hatutan tan ne'e, servisu-nain haree-labariknian sei simu formasaun atu hala'o modelu *childcare* ne'e ba organizaun sira seluk.

Tuir mai ne'e sumáriu badak kona-ba Alola nia program sira agora.

Saúde Inan no Oan nian

Área programa ida-ne'e uluk nanain haree ba oinsá atu rezolve numeru aas iha mortalidade inan no oan ninian liu-husi fornese servisu saúde nian, organizaun komunitária no kampaña edukasaun nian. Inisiativa importante ida maka promosaun atu fó inan nia susu-been ba kosok-oan, ne'ebé inklui motivasaun atu harii Grupu Apoiu ba Inan iha nasaun ne'e nia laran. Projetu 'Pakote Maternidade' nian representa atividade boot ida seluk ne'ebé uluk nanain bazeia iha Dili no Baucau. Pakote ho sasan báziku sira, hanesan hena no sasan sanitáriu ninian, fahe ba inan sira ne'ebé isin-rua. Fahe Pakote sira-ne'e atu fó motivasaun ba feto atu tuur-ahi iha Ospital, iha ne'ebé sira bele simu apoiu médiku profisionál.

Edukasaun

Fundasaun Alola buka atu hasa'e oportunidade ba edukasaun formál no informál ba feto no labarik-feto sira. Iha programa koordinadu ida kona-ba bolsa-estudu ba tinan tolu atu fó ba estudante feto besik na'in 800, husi eskola no universidade sira, liu-liu husi área rurál nian. Programa Eskola Belun halo ligasaun entre eskola sira iha Timor-Leste ho eskola parseiru sira

iha Australia atu bele fasilita aprendijazen entre comunidade sira. Eskola sira iha Australia simu material atu asegura inkluzoan iha curriculum aprendijazen kona-ba Timor-Leste.

Dezenvolvimentu Ekonómiku

Programa Dezenvolvimentu Ekonómiku nia objetivu maka atu “fó kbiit ba feto sira atu hetan independénsia ekonómika” (website Fundasaun Alola nian ‘Programa Dezenvolvimentu Ekonómiku’, Feveireiru 2007). Kona-ba programa atividade nian, Alola buka atu fó tulun ba feto sira-nia negósiu ki’ik oan sira no mós fó tulun atu mantein tradisaun kulturál, liu-liu husi feto nia artezanatu, hanesan soru hena tradisionál Timor nian *tais*. Alola agora iha loja artezanatu ki’ik oan ida iha nia eskritóriu prinsipál iha Dili nia kotuk.

Nu’udar organizasaun ida, Alola tau nia pozisaun hanesan lider ida iha área dezenvolvimentu ekonómiku feto nian, ne’ebé nia fó oportunidade servisu nian no asegura nia pesoál sira atu hetan apoiu iha sira-nia knaar nu’udar xefe uma-kain nian. Bainhira bele, kria servisu iha programa atividade sira, hanesan pozisaun ruanulu ne’ebé fó apoiu ba produsaun pakote maternidade nian, ka feto na’in sanulu ne’ebé tau iha servisu atu halo *reusable sanitary pads* ne’ebé fahe iha kampu Dezlokadu sira durante krize iha tinan 2006.

Advokasia

Fundasaun Alola promove no defende feto nia direitu, saúde, oportunidade no asesu ba assisténsia umanitária. Nia foka nia atividade ne’e husi nia Sentru Rekursus ba Feto nian. Alola fó apoiu ba kampaña anuál no oportunidade advokasia nian, hanesan Loron 16 Ativizmu Hasoru Violénsia no Loron Internasionál Feto nian. Hanesan parte iha ninia kampaña Loron 16, iha tinan 2006, Alola hala’o serimónia públika ida ho feto-faluk sira husi krize ne’e, ne’ebé halo parte liu-liu feto sira ne’ebé lakon sira-nia la’en iha polisia no forsa armada. Feto-faluk sira halo deklarasaun ida kona-ba sira-nia nesesidade hodi hato’o ba Primeiru-Ministru, Dr. José Ramos Horta. Governu foin daudaun ne’e deklarala nia kometimentu atu kontínua fó pensaun ba feto-faluk sira-ne’e. Alola fasilita nafatin feto sira-ne’e ninia soru-mutu fulan-fulan.

Sentru Rekursus ba Feto sira, ne’e fatin públika ida ne’ebé disponível ba feto sira. Nia iha livraria ida atu halo konsulta ba, komputadór públika rua, oportunidade atu dezenvolve koñesimentu spesífiku kona-ba uza komputadór ba lideransa, no nia atua hanesan sentru referénsia ida ba feto sira-nia advokasia. Liu husi Sentru Rekursus ba Feto sira, Fundasaun Alola fahe mós assisténsia umanitária iha forma sasan nian ba feto sira ne’ebé kuran. Iha Feveireiru 2007, Sentru Rekursus ba Feto sira muda ba fatin foun ida ne’ebé boot liu. Hein katak ida-ne’e sei fó oportunidade boot liu atu sai husi modelu assisténsia umanitária ninian hodi tama iha motivasaun ba grupu feto sira ne’ebé iha interese spesífiku ruma, feto-faluk sira husi krize, atu hasoru malu hodi sira rasik hatán ba sira-nia nesesidade. Fatin soru-mutu ne’e disponível mós ba rede feto sira ne’ebé iha tiha ona.

Hori fulan Abril 2007, programa Advokasia emprega tiha ona Empregadu Apoiu Distritál (DSW) nain neen hodi tulun no harii ligasaun metin liután ho rede feto nian sira ne’ebé asociadu ba Alola iha rai laran tomak, hanesan Grupú Apoiu Inan nian sira no grupu Artezanatu nian sira. Koordinadór sira ne’e sei servisu iha Lautein, Vikeke, Baukau, Likisá no Manatutu, no Alola hanoin hela atu aumenta tan ba ba distritu hitu seluk iha tinan rua oin. Inisiativa DWS ida ne’e nia objetivu mak buka hametin kapasidade grupu feto nian sira hodi partisipa ho ativu iha lideransa no dezenvolvimentu ba sira nia comunidade.

Jestaun

Área programa ida-ne'e foka ba estrutura no prátika organizaun ne'e nian, atu asegura resposta lalais ba feto sira-nia nesesidade, transparénsia, efisiénsia, jestaun efetiva no tau matan ba membru pesoál sira.

Kontaktu

Post: PO Box 3, Dili, Timor-Leste (via Darwin, Australia)
Tel: (670) 3323855
Email: info@alolafoundation.org
Website: <http://www.alolafoundation.org>
Alamat: besik Mercado Lama, Dili

Husi: Trembath, Anna no Damian Grenfell, Mapa ba Lala'ok Buka Igualdade Jéneru: Atividade Ajénsia La Governamentál no Internasionál nian iha Timor-Leste, Globalism Institute, RMIT University, Dili, July 2007, ISBN 978-0-646-47770-1, pp. 16-19.